

中國方志叢書·華中地方·第三八七號

據

清·劉長庚等修，侯肇元等纂
嘉慶十七年刊本

影印

四川省

漢州志

(五)

成文出版社有限公司印行

中華民國六十五年 月臺一版

漢州志

全五冊

發行人：黃 成 助

出版者：成文出版社有限公司

台北市郵政信箱二二六〇五號
台北市羅斯福路三段二四〇巷五號

印刷者：成文出版社有限公司

內政部登記證內版台業字第一一四七號

漢州志卷三十七

藝文志五

序

宋

送符制置被召序

何耕

二十五年冬上召四川制置使符公於成都明年春命
始至公以次付使事府事理裝戒行日於是賓佐掾吏
雜然相與懷公之德惜公之去往往有不懌者獨其客
何某揜袂奮臂抗聲於眾曰公召宐也已後矣公早揚

俊聲雄辭大篇甲乙上庠繹史繡經強記洽聞貴而彌
專老而不休於時爲耆儒登車澄清摘伏糾貪風烈巖
巖而不殘徘徊巴蜀十有餘歲最後以太府卿總四路
之賦國用以饒軍無乏食厥功茂焉於時爲材使者蜀
道謀帥帝難其人峻秩西清命公往臨剔蠹治荒公不
敢媮田婦畔夫知公勤勞於時爲賢方伯今天子總攬
萬幾躬行福威奮德名人登用無遺者万俟公來自沅
州至之日拜右僕射魏公沈公相繼起遠外位政府公
視數公皆一體人也顧安能久居此乎與其利專

於一方孰若澤被於天下與其擁旄仗鉞爲蕃宣保障之用孰若垂紳搢笏有謀謨規誨之益故曰公召宣也而吾徒尚何以戚戚然兒女悲爲哉雖然蜀父兄有蓄念於此久矣不敢徹聲於天子而敢私布於下執事公其聽之否乎自秦丞相當國逐蜀士如棄梗無一人綴文石之班望屬車之塵者或曰謂其輕而黨同丞相惡之故弗用嘻亦甚矣百步之內必有茂草而謂蜀之人人皆輕人人皆同也不幾於誣乎兩蘇公兄弟也伯氏以言語得罪瀕死不悔而其季淵靜木訥出於天性

蜀國范公與溫國司馬公平昔議論無一不同至樂律則終身不能相合也其不輕不同者亦可慨見矣或曰蜀地疎遠丞相忌之故弗用此又非也宰相之用人當問其賢不賢豈當計其疎不疎遠不遠耶今有橫木於道當舉以十夫之力則取諸吾隣里鄉黨而足矣至於當舉以千萬夫之力則取諸塗之人可也而必曰吾之父子兄弟焉吾之隣里鄉黨焉則木之橫於道者沒世不行舉夫天下之大過於橫木亦遠矣而宰相方且惟疎遠之務去嗚呼殆哉蜀父兄竊竊然不能忘情於是

者有以也夫側聞万俟公頻年於外涉艱阻知情僞甚
熟悉今其還宜必有至公甚盛之觀以懲勦前弊慰安
羣心者而沈公亦嘗爲政於梓於夔所至有惠愛旣去
人思之今公又自蜀以往天子其意者將振蜀人於二
三公之手乎未可知也公旣見天子於殿陛上退而與
万俟公魏公沈公論天下事孰通孰利孰病其能漠然
無一語於蜀哉蓋非今日庶政一新公道廓開之秋則
公雖有欲言之心而不可以言非公與沈氏在蜀日久
凡觀民風考論人物之詳則蜀人雖抱無窮之憾而不

敢以告語曰日中必昃操刀必割蓋言時之不可失也
公行矣當試爲蜀人圖之

張南軒先生文集序

朱

熹

元晦
新安

孟子沒而義利之說不明於天下中間董相仲舒諸葛
武侯兩程先生屢發明之而世之學者莫之能信是以
其所以自爲者鮮不溺於人欲之私而其所以謀人家
國則亦曰功利焉而已爾爰自國家南渡以來乃有丞
相魏國張忠獻公倡明大義以斷國論侍讀南陽胡文
定公論之經以開後學其託於空言見於行事雖若

不同而於孟子之言董葛程子之意則皆所謂千載而
一轍者若近故荊州牧張侯敬夫則又忠獻公之次子
而胡公季子五峯先生之門人也自其幼壯不出家庭
而固已得夫忠孝之傳既又講於五峯之門以會其歸
則其所以默契於心者人有所不得而知也獨其見於
說議則義利之閒毫髮之辨蓋有出於前哲之所欲言
而未究者措諸事業則夫宏綱大用鉅細顯微莫不洞
然胸次而無一毫功利之雜是以論道於家而四方學
者爭嚮往之入侍經帷出臨藩屏則天子亦味其言嘉

其績且將倚以大用而敬夫不幸死矣敬夫既沒其弟
定叟哀其故橐得四百篇以授予曰先兄不幸早世而
其同志之友亦少存者今欲次其文以行於世非子之
屬而誰可予受書愀然開卷亟讀不能盡數篇爲之廢
書太息流涕而言曰世復有斯人也耶無是人而有是
書猶可以少見其志然吾友平生之言蓋不止此也因
復益爲求訪得諸四方學者所傳凡數十篇又發吾篋
出其往還書疏讀之亦多有可傳者方將爲之定著繕
寫歸之張氏則或者已用別本摹印而流傳廣矣遽取

觀之蓋多嚮所講焉而未定之論而凡近歲以來設經
論事發明道要之精語反不與焉予因慨念敬夫天姿
甚高聞道甚早其學之所就既足以明於一世然察其
心蓋未嘗一日以是自足也比年以來方且窮經會友
口反諸心而驗諸行事之實蓋有不知所謂年數之不
足者是以其學日新而無窮其見於言語文字之閒殆
皆極於高遠而卒反就於平實此其淺深疎密之際後
之君子其必有以處之矣顧以次序之不時使其說之
出於前面棄於後者猶得以雜乎篇帙之閒而讀者或

不能無疑信異同之惑是則予之罪也夫於是乃復取
前所蒐輯參伍相校斷以敬夫晚歲之意定其書爲四
十四卷嗚呼使敬夫而不死則其學之所至言之所及
又豈予所得而知哉敬夫所爲諸經訓義惟論語說晚
嘗更定今以別行其他往往未脫稿時學者私所傳錄
敬夫蓋不喜也以故皆不著其立朝論事及在州郡條
奏民閒利病則上意多嚮納之亦有頗施行者以故亦
不著獨取其經筵口義一章附於表奏之後使敬夫所
以堯舜吾君而不愧於父師之傳者讀者有以識其端

云

明

周受菴詩選序

楊慎

粵若稽古吾蜀詩始萌芽蠶叢有日月二章蜀著龍歸
三曲蓋關塞未通禹貢以上時也隸風有江沱卽沱潛
之域頌稱清穆乃吉甫之詩聖垂刪述夔而尚矣爰漢
之興司馬相如體物瀏亮之餘復制廊廟樂府之作溢
爲封巒天覆之咏中葉擅名四海爲儔焉唐則陳子昂
爲海內文宗李太白爲古今詩聖降而劉灣雍陶符載

李遠唐求苑感之徒振其末響蘇文忠公宋代詩祀而
輕輟後進云文章妙天下詩律不逮古人蓋規摩之談
媚嫉之訾耳唐庚韓駒巽巖後溪魯交李石文丹淵喻
投藻以開皇明嘉州楊孟載青城王汝玉成都袁可潛
徐遵晦富順晏振之近得宐賓牟君倫長寧侯汝弼嘉
州安公石程以道卓然名家往年慎修全蜀藝文志之
不能盡也廣漢受菴周公穎異秉姿宏深績學經術古
文之餘剩爲冲融寂寥之句自筮仕至長憲外臺不廢
披閱討論可謂胸有萬卷書宦轍秦邊晉塞桂嶺昆池

可謂足行萬里路發之紀行詠之邊徼和之友生寄之
山水子夏之云止禮義莊周之云道性情管子之云紀
物陸機之云緣情左思之云詠史阮籍之云詠懷實皆
具體兼之和衷觀之可以備圖經衍之可以裨經畧豈
曰流連光景云乎世有爲高談者曰作詩無益則詩教
可廢商賜以衰矣受菴公以冊橐示慎曰選擇不必多
古人無多也慎快讀三復摘其必可傳者若何篇題曰
受菴詩選又序吾鄉詩之萌芽流裔以傳受菴天下士
而尚古人者慎以一邦一邑言鄙且難矣緊亦尊鄉敬

止之私爾尚竢海內名鉅掬爲太序茲其乘韋之先猷
糠之前云

王氏家譜序

宋述祖

嘗聞上有教化下有風俗蓋惟其教敷而化馴斯其風
行而俗易轉移自上動而後興起是凡民也惟人自悻
教家自厚俗無俟轉移化導而自興起仁厚孝友之風
薰蒸融液善俗以成家國攸賴其惟家譜之修乎余解
組歸來方事宗譜適郡侯王公枉駕授余王氏家譜書
以序言及受譜卒業始知侯仁厚孝友貽謀燕翼者卽

所稱人自惇教家自厚俗而自爲興起者也蓋侯以關
西舊家當宋元間世居靜之松柏谷我國初自鈍菴公
至侯九代矣代著忠烈孝廉儒雅之風詳在譜中今獨
敘侯之所爲用心遠圖者是譜勸自榮澤公更數君子
之手而後垂及今日故首作敘勸時纂修也世遠則易
忘故次世系勸興悽愴也親疎各攸敘故次世派勸尚
連屬也論必由素履故次世狀勸思奮勉也論人必求
全行故次世傳勸稽終身也女教爲風化之原故次外
傳勸謹內則也嗚呼一譜修而七勸備譜信不可少也